

## **CYNGOR BWRDEISTREF SIROL RHONDDA CYNON TAF**

### **DEDDF YMDDYGIAD GWRTHGYMDEITHASOL, TROSEDDU A PHLISMONA 2014**

#### **GORCHYMYN DIOGELU MANNAU CYHOEDDUS (RHEOLI CŴN) CYNGOR BWRDEISTREF SIROL RHONDDA CYNON TAF 2020**

Drwy arfer ei bwerau o dan Adran 59 o Ddeddf Ymddygiad Gwrthgymdeithasol, Troseddu a Phlisma 2014 ('y Ddeddf'), mae Cyngor Bwrdeistref Sirol Rhondda Cynon Taf ('y Cyngor') yn gwneud y Gorchymyn Diogelu Mannau Cyhoeddus canlynol:

1. Enw'r Gorchymyn hwn yw Gorchymyn Diogelu Mannau Cyhoeddus (Rheoli Cŵn) Cyngor Bwrdeistref Sirol Rhondda Cynon Taf 2020 ('y Gorchymyn').
2. Mae'r Gorchymyn hwn yn dod i rym ar 1 Hydref 2020, a bydd mewn grym am gyfnod o dair blynedd ar ôl y dyddiad hwnnw.

#### **TROSEDDAU**

3. Effaith y Gorchymyn hwn yw gorfodi'r amodau canlynol yn Rhondda Cynon Taf:
  - (i) Gwahardd achosion o gŵn yn baeddu ym mhob man cyhoeddus yn Rhondda Cynon Taf.
  - (ii) Ei gwneud yn ofynnol i berson sy'n gyfrifol am gi ei gadw ar dennyn ar bob adeg mewn mynwentydd mae'r Cyngor yn berchen arnyn nhw, neu'n eu cynnal.
  - (iii) Ei gwneud yn ofynnol i berson sy'n gyfrifol am gi gario bagiau neu nwyddau addas eraill i gael gwared ar faw cŵn, ar bob adeg.
  - (iv) Ei gwneud yn ofynnol i berson sy'n gyfrifol am gi ddilyn cyfarwyddyd Swyddog Awdurdodedig, os bydd yn ei ystyried yn rhesymol angenrheidiol, i gadw ci ar dennyn mewn man cyhoeddus yn Rhondda Cynon Taf am gyfnod ac/neu o dan amgylchiadau yn unol â chyfarwyddyd y Swyddog Awdurdodedig.
  - (v) Gwahardd cŵn rhag mynd ar bob safle ysgol, lle chwarae a chae chwaraeon mae'r Cyngor yn berchen arnyn nhw, neu'n eu cynnal.
4. At ddibenion y Gorchymyn hwn:
  - 4.1 ystyr 'ci/cŵn yn baeddu' yw achos o berson sy'n gyfrifol am gi yn methu â chael gwared ar faw'r ci hwnnw ar unwaith;
  - 4.2 bydd rhoi baw cŵn mewn bin sy'n cael ei ddarparu ar gyfer y diben hwnnw, neu ar gyfer cael gwared ar wastraff, yn ddull gwaredu digonol. Ni fydd peidio â gwybod am achos o faeddu (oherwydd nad oedd y person yn yr ardal gyfagos, neu oherwydd rheswm arall) yn esgus rhesymol dros beidio â chael gwared ar y baw;
  - 4.3 ystyr 'person sy'n gyfrifol am gi' yw person sydd â chi yn ei feddiant yn rheolaidd ar unrhyw adeg, heblaw bod person arall yn gyfrifol am y ci ar yr adeg honno;

- 4.4 ystyr 'man/mannau cyhoeddus' yw unrhyw le y gall aelod o'r cyhoedd fynd iddo, drwy dalu neu fel arall, pan fo ganddo'r hawl i wneud hynny oherwydd caniatâd datganedig neu ymhlyg;
  - 4.5 ystyr 'Swyddog Awdurdodedig' yw cwnstabl neu berson y mae'r Cyngor wedi ei awdurdodi i orfodi'r Gorchymyn hwn.
  - 4.6 At ddibenion 3(iv) uchod, ni chaiff Swyddog Awdurdodedig ond cyfarwyddo person i roi a chadw ci ar dennyn pan fo angen rhesymol i wneud hynny i atal niwsans, neu i atal ymddygiad gan y ci sy'n debygol o beri niwsans neu aflonyddwch i unrhyw berson arall, neu i atal y ci rhag peri gofid neu aflonyddwch i unrhyw anifail;
  - 4.7 ystyr 'Rhondda Cynon Taf' yw bwrdeistref sirol Rhondda Cynon Taf i gyd, fel sydd wedi ei nodi yn Atodlen 1 i'r Gorchymyn hwn;
  - 4.8 ystyr 'mynwentydd' yw'r darnau o dir fel sydd wedi ei nodi yn Atodlen 2 i'r Gorchymyn hwn;
  - 4.9 ystyr 'ysgolion' yw'r darnau o dir fel sydd wedi ei nodi yn Atodlen 3 i'r Gorchymyn hwn;
  - 4.10 ystyr 'mannau chwarae' yw'r darnau o dir fel sydd wedi ei nodi yn Atodlen 4 i'r Gorchymyn hwn;
  - 4.11 ystyr 'caeau chwaraeon sydd wedi eu marcio' yw'r darnau o dir fel sydd wedi ei nodi yn Atodlen 5 i'r Gorchymyn hwn;
  - 4.12 ystyr 'Safleoedd Cyngor Cymuned' yw'r darnau o dir fel sydd wedi ei nodi yn Atodlen 6 i'r Gorchymyn hwn;
5. Mae'n drosedd i berson, heb esgus rhesymol, wneud unrhyw weithgaredd sydd wedi ei wahardd o dan y Gorchymyn hwn, neu fethu â chydymffurfio â gofyniad sy'n berthnasol iddo o dan y Gorchymyn hwn.
  6. Mae'r Cyngor yn fodlon bod yr amodau yn Adran 59 o'r Ddeddf wedi cael eu bodloni a'i fod, yn yr holl amgylchiadau, yn addas ac yn rhesymol gwneud y Gorchymyn hwn at ddibenion gwahardd y gweithgareddau uchod a chyflwyno'r gofynion sydd wedi eu nodi. Mae effaith neu effaith debygol y gweithgareddau yn, neu'n debygol o fod yn, effaith gyson neu barhaus, i'r graddau y byddan nhw'n afresymol, gan gyfiawnhau'r cyfyngiadau sy'n cael eu gorfodi gan y Gorchymyn hwn.

## **EITHRIADAU**

7. Nid yw darpariaethau'r Gorchymyn hwn yn berthnasol i berson yn yr amgylchiadau canlynol:
  - (i) Mae ei enw ar gofrestr o bobl ddall neu rannol ddall sydd wedi ei llunio yn unol ag Adran 29 o Ddeddf Cymorth Gwladol 1948.
  - (ii) Mae ei enw ar gofrestr o bobl "sydd â nam ar eu golwg", "sydd â nam difrifol ar eu golwg", neu "sydd â nam ar eu golwg ac ar eu clyw sydd, gyda'i gilydd, yn cael effaith sylweddol ar eu bywydau bob dydd", sydd wedi ei llunio yn unol ag Adran 18 o Ddeddf Gwasanaethau Cymdeithasol a Llesiant (Cymru) 2014.
  - (iii) Mae ganddo anabledd sy'n effeithio ar ei symudedd, ei fedrusrwydd llaw, ei allu i gydsymud y corff, ei allu i godi neu gario gwrthrychau pob dydd, neu ei allu i'w symud mewn ffordd arall, i'r graddau nad yw'n rhesymol disgwyl iddo godi'r baw.
  - (iv) Mae ganddo anabledd arall ac, o'i herwydd, nid yw'n rhesymol disgwyl iddo godi'r baw.

8. Nid yw darpariaethau'r Gorchymyn hwn yn berthnasol i gi sydd wedi cael hyfforddiant gan elusen gofrestredig i gynorthwyo person sydd ag anabledd, ac mae person anabl yn dibynnu arno am gymorth.
9. At ddibenion y Gorchymyn hwn, ystyr 'anabledd' yw cyflwr sy'n cyfateb i'r diffiniad o anabledd at ddibenion Deddf Cydraddoldeb 2010.
10. Ni fydd dim yn y Gorchymyn hwn yn berthnasol i weithgareddau ci gwaith, tra bod y ci hwnnw'n gweithio. Mae hyn yn cynnwys cŵn sy'n cael eu defnyddio ar gyfer cyflawni gwaith chwilio ac achub mewn argyfwng, gwaith gorfodi'r gyfraith, gwaith Lluoedd Arfog ei Mawrhydi, a gwaith cŵn ffermydd sy'n cael eu defnyddio ar gyfer corlannu neu yrru anifeiliaid.
11. Pan fo person sy'n gyfrifol am gi am ddibynnu ar un o'r eithriadau yn y Gorchymyn hwn, arno ef y bydd y baich o ran profi ei fod yn bodloni gofynion yr eithriad hwnnw.

**COSBAU**

12. Mae person sy'n euog o drosedd o dan y Gorchymyn hwn yn agored i euogfarn ddiannod a dirwy nad yw'n uwch na lefel 3 o'r raddfa safonol.
13. Caiff Swyddog Awdurdodedig gyflwyno Hysbysiad Cosb Benodedig i berson sy'n torri'r Gorchymyn hwn, a fydd yn gyfle iddo gael ei ryddhau o fod yn agored i euogfarn o'r drosedd, os bydd yn talu cosb benodedig.

SÊL GYFFREDIN CYNGOR BWRDEISTREF SIROL RHONDDA CYNON TAF

a osodwyd yma ger bron

*A. S. Wilkins*

Andy Wilkins

Cyfarwyddwr y Gwasanaethau Cyfreithiol



AWDURDOD/ AUTHORITY	
Cynllun Dirprwyo/ Scheme of Delegation	
DYDDIAD/ DATE	
ARDYSTIWD GAN/ CERTIFIED	

12011/1

**ATODLEN 1 – ARDAL RHONDDA CYNON TAF**

**ATODLEN 2 – MYNWENTYDD**

**ATODLEN 3 – YSGOLION**

**ATODLEN 4 – MANNAU CHWARAE**

**ATODLEN 5 – CAEAU CHWARAEON SYDD WEDI EU MARCIO**

**ATODLEN 6 - SAFLEOEDD CYNGOR CYMUNED**